



Paran d'esser cuntents cun l'entschatta da la construcziun dal nov Center da cumpetenza d'agricultura a Cazas: Curdin Foppa, schef da la cussegliaziun purila, Hansjörg Hassler, president Uniun chantunala dals purs e Michael Schumacher, architect (da san.).

FOTO G. N. STGIER

Vegnir pli manaiavel als purs

Cazas: Nov center da cumpetenza d'agricultura

DA GION NUTEGN STGIER / ANR

■ **Quatter instituziuns grischunas dals purs retschaivan in nov edifizii d'administraziun. Grazia a quel vul ins er meglierar ils servetschs en favur dals purs da noss chantun. Il nov edifizii custa dus milliuns e sustegn finanziel vegn er da l'Agid svizzer per la muntogna.** Dapi il 1998 è l'Arena grischuna a Cazas il lieu per exposiziuns ed aucziuns da biestga, dentant er per autras occurrenzas. Cun il nov center da cumpetenza da l'agricultura a Cazas vul l'Uniun chantunala dals purs contribuir insatge per in bun avegnir da l'agricultura grischuna. Fin oz en las quatter instituziuns purilas, l'Uniun chantunala dals purs, «GraubündenVieh AG», la Cussegliaziun purila regiunala da Tusaun ed il Rentg da maschinas dal Grischun staziunadas en quatter differents lieus. A partir dal matg 2011 èn quellas quatter instituziuns da chasa en il medem edifizii. A chaschun da l'emprima badigliada ha *Hansjörg Hassler*, il president dals purs

grischuns, ditg che in edifizii d'administraziun cuminaivel fetschia senn. «Cun il nov center da cumpetenza d'agricultura vulain nus er augmentar en general la valur dal lieu a Cazas», ha accentuà Hansjörg Hassler. In ulteriur fatg positiv saja che cun sa chattar las administraziuns da las quatter instituziuns en il medem edifizii saja pussaivel per ils purs da far adiever da divers servetschs en il medem lieu.

Da Cuira a Cazas

A partir dal matg 2011 sa chattà l'administraziun da l'Uniun chantunala dals purs betg pli a Cuira. Cun midar l'administraziun da quella instituziun da la chapitala grischuna a Cazas vul l'Uniun chantunala dals purs vender ils biros a Cuira. In nov dachasa survegn dentant er la cussegliaziun purila regiunala che mida da Tusaun a Cazas. Da Cuira en il Grischun central mida però er il biro dal rentg da maschinas e quel da «GraubündenVieh AG». Cun quels trais partenaris ha l'Uniun chantunala dals purs fatg

in contract da fittanza sur plis onns. L'Arena grischuna a Cazas duai en l'avegnir insomma daventar in lieu d'entupada per l'agricultura e per la populaziun betg purila, ha ditg Hansjörg Hassler a chaschun da l'emprima badigliada dal nov center da cumpetenza d'agricultura.

23 posts da lavur

L'Uniun chantunala dals purs sto quintar cun custs da dus milliuns per la construcziun dal nov edifizii a Cazas. Sustegn finanziel survegn l'uniun da l'Agid svizzer per la muntogna. *Romano Tomaschett*, il represchentant da quella instituziun naziunala, ha ditg ier a Cazas che quel project meritava sustegn. Il nov center d'agricultura vegn construi tenor il plan da l'architect *Michael Schumacher* da Cuira. Construi vegn il bajetg da mir e sunter tavlegià cun eternit. En il nov center da cumpetenza d'agricultura lavuran a partir dal proxim matg 23 persunas, repartidas sin 11 biros.